

Kommunit missingersuusiortarnerat, aningaasanik tigatoriaannaateqarnerat, naatsorsuutaat, kukkuniuusoqarnerat kiisalu karseqarnerat naatsorsuuseriveqarnerallu pillugit Namminersorlutik Oqartussat nalunaarutaat

Kommunit aqunneqarnerat pillugu Inatsisartut inatsisaat nr. 14, 5. december 2008-meersumi § 40, imm. 5, § 41, imm. 3, § 46, imm. 3 aamma § 49, imm. 2 malillugit aalajangersarneqarpoq:

Missingersuusiortarnek

§ 1. Kommunit missingersuutaat ukiunut arlalinnut missingersuutitalit isertitanit akileraarutit pillugit Inatsisartut inatsisaanni kommuninut procentimik annertussusiliinissap aalajangiivigineqarnissaanut killiliussaq naatinnagu akuersissutigineqartassapput.

Imm. 2. Aningaasaqarnermut ataatsimiititaliap killiliussaq imm. 1-imi taaneqartoq naatinnagu kingusinnerpaamik qaammatinik marlunnik sioqqullugu missingersuutissanut siunnersuut kommunalbestyrelsimut tunniutissavaa.

Imm. 3. Aningaasaqarnermut ataatsimiititaliami missingersuutitut siunnersuummi ikinnerussuteqartut oqaaseqaataanni § 2, imm. 1 aamma 4-mi piumasaqaatit naammassineqarsimassapput.

§ 2. Aningaasaqarnermut ataatsimiititaliap missingersuutitut siunnersuutaa kommunip isertitassaanut aningaasartuutissaanullu tamanut taamatuttaaq kommunip aningaasanik tigatoriaannaataani aningaasaataasalu inissisimaffini nikerarnernut tunngasuusaaq.

Imm. 2. Aningaasaqarnermut ataatsimiititaliap missingersuutitut siunnersuutaa missingersuusiortaatsimik missingersuutinu immikkoortiterinerup annertussusianik toqqaanermut nassuiaammik ilaqartinneqassaaq.

Imm. 3. Missingersuutitut siunnersuut taamatuttaaq aningaasaliissutitut siunnersuutitut ataasiakkaanut nassuiaalluni oqaaseqaatinik ilaqartinneqassaaq taamaalilluni tunngaviummik aningaasaliinerni taaneqassalluni, qanoq ittunik piumasaqaateqarluni aningaasaliissutit atugassanngortinneqassanersut, aningaasaliissutinu allani, isertitassatut aningaasartuutissatut aningaasaliissutini killiffimmi aningaasaliissutini, suliaasat aningaasaliivigineqartussat sukumiisumik allaaserineqassallutik.

Imm. 4. Missingersuutitut siunnersuut aningaasaliissutissanut siunnersuutitut tamanut minnerpaamik ukiunut pingasunut missingersuusiaagallartunik ilaqartinneqartassaaq, suliaasaqarfimmi pineqartumi kommunip allanngoriartortoqarnissaanik ilimagisai tassani taaneqarlutik. Missingersuutitut oqaasertaliussani ukiuni missingersuusiortofugallartuni allanngoriartornissaq allaaserineqassaaq.

§ 3. Kommunit aningaasat atoriaannaat nikerarnerinik missingersuusioneri pissapput aningaasanut tigoriaannarnut missingersuusiatus isikkulerlugit, missingersuusiatus tamarmiusunut ilanngullugit akuersissutigineqartassatut.

Imm. 2. Aningaasanik tigoriaannaateqarnermut missingersuutini kommunip missingersuutini aningaasaliissutinik tamanik ingerlaavartumik atuinera allassimassaaq, taamatuttaaq killiffimmi aningaasaliissutit aningaasallu nikerarneri.

Imm. 3. Aningaasanik tigoriaannaateqarnermut missingersuutit nassuiaatinik allakkianik oqaaseqaatinilluunniit ilaqartinneqassapput.

Imm. 4. Kommunit sukkulluunniit aningaasanik tigoriaannaateqassapput ingerlaavartumik pisussaaffit akilerneqartarnissaannut naammattunik. Karsimiittuutit ulloq 31. december minnerpaamik kommunip ingerlatsinerneq sanaartornermullu aningaasartuutaasa 5%-erissavaat.

§ 4. Kommunip killiffimmi naatsorsuutiniittunik missingersuusiata aningaasat tigoriaannaat uninngasuutit, pisassat akiitsullu sivikitsumik piffissalikkat, pisassat akiitsullu sivisuumik piffissalikkat kiisalu pigisat nalillit tunineqarsinnaanngitsut akiitsullu kommunimi allanngoriartornerat taaneqassapput.

§ 5. Ilasutitut aningaasaliissutinut siunnersuummi allassimassapput ilasutitut aningaasaliissutit aningaasalersornissaannut siunnersuut aamma ilasutitut aningaasaliissutit aningaasatigut kingunerisassaat. § 2, imm. 3 aamma imm. 4, taamatuttaaq ilasutitut aningaasaliissutini atorineqassapput.

Imm. 2. Aqutsinerneq inatsimmi § 43, imm. 2 inatsisitigut tunngavigalugu missingersuutini nikisiterinerit aningaasaqarnermut ataatsimiititaliamit suliarineqartut kommunalbestyrelsimut ilisimatitsissutigalugit saqqummiunneqassapput.

Imm. 3. Ilasutitut aningaasaliissutissanut siunnersuutit kommunalbestyrelsimut saqqummiunneqarnerminni aningaasaqarnermut ataatsimiititaliamit inassuteqaammik ilaqartinneqartassapput, ilasutitut aningaasaliissutit ataatsimiititaliap ataavartup suliaasaqarfianut tunngasuuppata taamatuttaaq ataatsimiititaliamit pineqartumiit.

Aningaasaqarnermik aqutsineq

§ 6. Kommunilbestyrelsi kommunip aningaasaqarnermut aqutsineranut aalajangersakkanik aalajangersaassaaq.

Imm. 2. Missingersuutit akuersissutigineqarnerannut atatillugu kommunalbestyrelsip ukiumi tulluittumi aningaasaliissutinik nakkutilliinissamut piffissaliussat aalajangersassavai. Aningaasaliissutinik nakkutigineqartunut ilaassapput ingerlatsineq, sanaartukkat aamma aningaasaatini nikerarnerit aningaasanillu tigoriaannaatinut missingersuutit. Aningaasaliissutinik nakkutilliineq ingerlaavartumik suliarineqartassaaq ikinnerpaamillu ukiumut pingasoriarluni kommunalbestyrelsimut saqqummiunneqartassalluni.

Naatsorsuutit

§ 7. Kommunip naatsorsuutai ukiumi naatsorsuuteqarfiusup kingornatigut ukiumi apriliip qaammataa naatinngu aningaasaqarnermut ataatsimiititaliamit saqqummiunneqartassapput.

Imm. 2. Kommunilbestyrelsip naatsorsuutini suliaqarnera, takuuk aqutsinerneq inatsimmi § 46, imm. 2, kingusinnerpaamik pissaaq naatsorsuutit aningaasaqarnermut ataatsimiititaliamit saqqummiunneqarnerata kingornatigut kommunalbestyrelsip pisarnertut ataatsimiinnerani siullermi.

Imm. 3. Kommunip naatsorsuutaanut ilaassapput ukiumi naatsorsuuteqarfiusup kingornatigut februaarip

qaammataata naanissaa tikillugu ukioq naatsorsuuteqarfusoq pillugu atukkat isertitallu tamarmik.

Imm. 4. Ukiuni arlalinni sanaartugassanut tunngatillugu naatsorsuutitut oqaaseqaatini missingersuutitut atukkat nassuiarneqassapput, taamatuttaaq utertillugit akilikkanik tiguneqarsimasinnaasut sanaartukkap inaarsarneqarnissaanut piffissalersuinnermut tunngatillugu. Kommunip sanaartukkamut ataatsimut aningaasartuutissaanut killiliussanut tunngatillugu atussamaakkanik ilimagisat imatut annertussusilerneqassapput oqaaseqaatit missingersuutitut tunngatillugu iluarsineqartariaqartunut tunngavigineqarsinnaanngorlugit.

Imm. 5. Aningaasat atorineqanngitsut naatsorsuutini aningaasartuutitut allanneqarsinnaanngillat, aningaasat ukiumi naatsorsuuteqarfusussami aningaasaliissutigineqaqqikkaluarpataluunniit.

Imm. 6. Naatsorsuutitut oqaaseqaatitut ilaassapputtaaq kommunip killiffimmik kontuini nikerarnerit immikkut pingaaruteqartut.

§ 8. Naatsorsuutitut kommunalbestyrelsip oqaaseqaataanik ilallit, takuuk aqutsinnermut inatsimmi § 46, imm. 2, kommunalbestyrelsip suliarinninnera kingusinnerpaamik qaammammik ataatsimik kingoqqullugu Naalakkersuisunut nassiunneqassapput.

Kukkunersiuineq

§ 9. Kukkunersiuusut ukiumoortumik naatsorsuutitut kukkunersiorneqarnerat pillugu ukiumoortumik nalunaarusiamik tunniussaqaartassapput. Kukkunersiuusut taamatuttaaq ukiup ingerlanerani ilaannakortumik nalunaarusiamik tunniussaqaartassapput tamanna piumasarineqarsimappat kukkunersiuusulluunniit tamanna pisariaqartissimassappassuk.

Imm. 2. Ilaannakuusumik nalunaarusiami kukkunersiuusimaneq nassuiarneqassaaq, taamatuttaaq pissutsit kukkunersiuusut saqqummiutissallugit pissutissaqaartissimasaat. Kukkunersiuusut oqaaseqaateqassapput isumaqarunik naatsorsuutini pineqartut kommunalbestyrelsip aalajangiinneritut naapertuutinningsut imaluunniit iliuuseqartoqarsimasoq malittarisassanut atuuttunut akersiusumik.

§ 10. Kommunilbestyrelsip kingusinnerpaamik kukkunersiuusut nalunaarusiaata kalaallisuuata kommunimit tiguneqareerneratigut qaammatit pingasut qaangiunneranni kukkunersiuusut nalunaarusiaat suliarissavaa.

Imm. 2. Kukkunersiuusut nalunaarusiaannik kommunalbestyrelsip suliarinninnera kingusinnerpaamik ullunik 14-inik kingoqqullugu kommunalbestyrelsip kukkunersiuusut oqaaseqaataannut akissuteqarnera Nakkutilliisuutitaasunut nassiunneqassaaq.

§ 11. Kommunilbestyrelsip kukkunersiuusut nalunaarusiaannik kommunalbestyrelsip isummerfigisariaqagaani akissuteqarnermini makku sianiginiassavai:

- 1) Kukkunersiuusut sulianik ingerlatsinerup suliallu ingerlaartarfisa allanngortinneqarnissaannik pitsanngoriaateqarnissaannilluunniit kaammattuuteqarsimappata, kommunalbestyrelsip oqaatigissavaa qanoq iliorluni piffissallu qanoq ilinerani allanngortitsisoqassanersoq pitsanngorsaasoqarluniluunniit,
- 2) kukkunersiuusut kommunip suliamik ingerlatsinerani kukkunernik aalajangersimasunik tikkuagaqarsimappata kommunalbestyrelsip ilisimatitsissutigissavaa qaqugu kukkuneq iluarsineqassanersoq oqaatigissallugulu kukkusimaneq suliat ingerlaartarfiini imaluunniit suliassani allani allanngortitsinissamut pisariaqartitsinersoq siunissami kukkusoqartannginniassammat,
- 3) kommunalbestyrelsip kukkunersiuusut oqaaseqaataat akuerisinnaanngippagu tamatumunnga pissutaasoq akissuteqarnermi taaneqassaaq.

Karseqarnej naatsorsuuseriveqarnerlu

§ 12. Kommunip karseqarneranik naatsorsuuseriveqarneranillu aqqissuussinermut suliallu ingerlaartarfinut malittarisassat erseqqinnerusut aqutsinermut inatsimmi § 49, imm. 1 naapertorlugu kommunalbestyrelsimit aalajangersarneqassapput.

Imm. 2. Malittarisassat imm. 1-imi taakkartorneqartut imarisaat kukkuniarsiuisut kommunalbestyrelsillu isumaqatigiinngissutigissappatigit Naalakkersuisut aalajangiissapput.

Atuutilerfia

§ 13. Nalunaarut manna atuutilerpoq 15. august 2010-mi. Peqatigitillugu atuukkunnaarsinneqarpoq kommunit missingersuusiortarnerat, naatsorsuutaat, kukkuniarsiuisarneq aamma karseqarnerat naatsorsuuseriveqarnerallu pillugit Namminersornerullutik Oqartussat nalunaarutaat nr. 29, 18. september 1995-imeersoq.

Namminersorlutik Oqartussat, ulloq 26. juli 2010

Anthon Frederiksen

/

Hans-Erik Bresson

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

